

鹹酸甜

播出時間：2022 / 12/14 星期三 中午 12:00

報報小達人：802 魏于婷 稿件編輯：陳思恩老師

各位老師，各位同學，大家午安，我是 802 魏于婷，我是今天的報報小達人，今天，我要為大家播報的內容，是：鹹酸甜

人攏叫阮阿爸「鹹酸甜的」，因為伊較早捌佇商展咧賣鹹酸甜。阿爸是彰化人，細漢厝裡散赤，無通予伊去讀冊，所以大漢干焦會當做一寡粗重的工課。閣因為袂曉好好仔照顧家己，七少年、八少年就帶痒。結婚了後，就搬去較燒熱的屏東，阿母後頭厝遐踫。

阿爸為著某囡，人生閣加一味心酸的味。來到屏東，阿爸逐工去外口四界覓，那覓那看有啥物生理通做。伊頭殼誠好，落尾共阿母講：「無，來賣咱彰化八卦山出名的鹹酸甜好矣！」拄開始干焦暗時去排商展爾爾，等兩個小弟出世，閣想欲買一間家己的厝。伊就拚勢做，透早擔擔佇菜市仔喝賣，中晝轉來食飯。歇一睏仔，下晡就閣割果子咧賣，欲暗仔轉來暗頓食煞，隨閣拚去商展賣鹹酸甜。按呢從來從去，毋捌聽伊咧喊累。若商展拄好排到阮庄，我會綴去共鬥賣。歇寒、歇熱的時，就逐工綴伊去別庄。因為有去鬥賣，閣較了解伊心內的酸佻苦。

阿爸頂真閣實在，貨攏愛親身去看過才會放心，所以年節時仔，伊攏騎 oo-tóo-bái 轉去彰化，順繼去看貨，才拜託頭家共貨寄落來。阿爸講生理愛做信用的，因為按呢，人客足濟，嘛才有法度共阮這陣囡仔對一蕊紅紅晟甲大人。

阿爸的愛，若像共伊性命的鹹味、酸味，變做甜味，傳予囡兒序細。毋過嘛因為日也做、暝也操，原本虛荏的身體就愈害矣。會記得我國中的時，佇房間讀冊，定定會聽著阿爸倒佇隔壁間的眠床頂哼哼喘，彼陣我心肝頭規个綴咧酸，喺嘛定定無細膩去舐著目屎的鹹味。

好佳哉，天公疼憐人，後來人共報講，運動對身體真好，伊就開始逐工足骨力運動。親像行路、踏山佻練氣功，閣會去阮遐的涼山水沖泗水閣沖身軀。

就按呢，伊的身體就沓沓仔好起來矣！這馬伊已經七十外仔外矣，猶是逐工佻阿母去山頂行路。阿爸講會當度過痒，會當陪阮大漢，看著囡孫成人，就是一種福氣。以前的鹹味、酸味算啥物，早就成做人生正港的甜味囉。

以上是今天的 Happy 播，多謝收聽！期待下次再相見！